

Kayëte kigëna mba Pol nte kerëhnëka Timote Wade yehëhna hnë inji kayëte

Afayik Pol kerëhnëka kayëte kigëna Timote, «ajë mën ale ÿahnëbu hn'ikwëtahn». Mpëd Pol cëdik Rom hna (1.8, 17), yëbëlan bëhn wafëhw mbëd g'iryaw̃ g'imbëd g'iryaw̃ gë bëhn wafëhw imbëd g'iryaw̃ g'imbëd gë warar (66 gë 68) ga ndëcëk hnagi Yesu ÿa. Kayëte nte hamënayend ye. Pol njëtëk gojëlähna d'us cëmahn. Ñad kamënaÿehna Timote nko kahnënda hnë vakaraŋ Vikerëh hna, lakënde haryënkw hambah hna do horot hna do vakaraŋ wamër. Andënkwëtehnëdëha uyëd Wënu ña nte nuÿak ña wati le tindëkawo Pol wëbák ña, uyëd ule rëfëka mbalëtahn soje d'oku lëwu ÿa hnë vacery sali hna. Pol njëd'aka fëna Timote siyab lëwu ÿa dënk hnë wapuhnala kayëte hna.

Wëlin wanës wakwëhn nafa hn'ini kayëte: d'oku, ikahnënda, fanka, uyëd, toña, dënkwëta, wanës, ayohal.

Wëlin gante nke kayëte ka:

Simpaÿi (1.1-2)

Ikamënaÿehn hn'ikahnënda (1.3-18)

Sodafe Këris (2.1-13)

Ayohal afërën, ayohal Ahwëhn (2.14-26)

Wafac warëkwa (3.1-17)

Pëyahñ Wanës Wën (4.1-8)

Wanira watëkwa do gë simpaÿi rëkwa (4.9-22)

Simpaÿi

¹ Ami Pol, ale ye afayik Yesu Këris kabi Wënu ña ÿak koyëna, soje pëyahn uwám ule ntehnëko Wën njëdaďëhëhni vahnë vële hwëtahnëka Yesu Këris va,

² kerëhnëryidëmi Timote, fatah mën fante ÿahnëbu hn'ikwëtahn. Arabi Wën Rëm ÿa do gë Yesu Këris Ahwëhn fu ÿa njëďënihi ipërëna gë ikaÿëhnahn do gë yam.

Ikamënaÿehn hnë kahnënda

³ Camehnëďëfuha Wën hunte ryokuñëhnëďëfu g'inahan pacah, had vacërakëlo mën, nahadëmi g'umëď gë g'anent nte-wo-nte njëfaďëfu ña.

⁴ Ndënkwëtaďëfu wankwën hu ña, do ñankahnëko dus vok hnuÿi pëbahno uhnatah wã.✧

⁵ Ndënkwëtaďëfu ikwëtahn hu paryi nte kwëhnaniho ten vëhni hnëmuh sankaf Lowis gë hnëmuh Ënis ña.

⁶ Soje rac ryënkwëtehnahnëďëmi wañi: yaŵënëry dus uyëď Wën le hnuÿaru ante tindëmino wëbák ña.

⁷ Kabi Iyir ante njëďakëfu Wënu ña nambëna fanka, Iyir nte yabënëďëhëfu fanka ye gë inahn do gë iyët vankaf fu.

⁸ Awa antë cëfëhni soje aye seďe Ahwëhn fu ÿa, ma ami ale sëďik soje lëwu ÿi. Bare

✧ **1:4 1.4:** Vantiyehn 20.37

korotëntëryi g'ami soŋe Wanës Wakasëk ɲa alihahnënd fanka fale njëdfaki Wënu ɲa,

⁹ umë ale fehëtëkëfu do wăcëkëfu nkeyin vēfacah. Gena soŋe ifërën ile liden ŷa, bare ipëhna dëwu ɲa dënk ye gë ipërëna dëwu ɲa. Ipërëna tac, nte yëdayinëkëfuno hnë Yesu Këris kobëri wapëgwa hna,

¹⁰ tame tufahniko g'icahn Afehët fu ɲa, Yesu Këris. Umë rëkwehnëk fanka icëm fa do, gë Wanës Wakasëk ɲa, njëtëndanëk uwám paryi g'uwám usër.

¹¹ Do soŋe iŷi doku Wanës Wakasëk tëhnako Wën yewu afëyahn, afayik do aharaŋ,

¹² do soŋe rac horotahnëdëfu aki. Bare cëfëhnëlohna, kabi njëtëfu hnë ale kwëtëfu ikwëtahn mën ɲa do pacëko kwëhnak fanka njawën ile kwëtehnañëko ŷa hafo hnë Fac Kiti hna.

¹³ Yawëñëry dŷus wanës toña wante wëryëru hnë ŷal mën ɲi, hnë ikwëtahn do gë hn'ɲahn nte ye hn'ibëmënkël gë Yesu Këris hna.

¹⁴ Keryëry dŷus, gë idema Iyir Ipacah nte ye hnë fuhnë ɲa, wapërën wante hwëtehnañiru ɲi.

¹⁵ Njëtëru vëvë Asi va fop tavëniho, hnë vërac nkentiniho Fijel gë Erëmojen.

¹⁶ Arabi Ahwëhn a kaŷëhna hna gë tere Onesifor ŷa, kabi umë njawënehnëdëhoŷo wati-wo-wati, do cëfëhnëlawohna g'ami ale sëdiko ŷa;

¹⁷ bare ante njijëko Rom ɲa, njëkëlehnëkowo gante-wo-gante hafo nuwo.

¹⁸ Arabi Ahwëhn a ndemahna nuŷa ikaŷëhnañ Wënu ɲa hnë Fac Kiti hna. Njëtëru

alëbëhni vahnë va fop gante ndemako ka hnë nkol Efes hna.

2

Sodafe Këris

¹ Awa wëjë, ajë mën hn'ikwëtahn, njëkëlehñeryind ayawñenand g'ipërëna nte ye hn'ibëmënkël gë Yesu Këris.

² Do wante harañëmi tase wasedë wayabah, kwëtehñahnëryihni vahnë vële hahnëndak, vële seryëk do hođ vëhni dënk karanënihëhni vëhañwary.

³ Korotëntëryi g'ami had sodafe fërën va Yesu Këris.

⁴ Sodafe le ye hnë đoku, ge ñad nuña icamehn asankaf alëwu ña, kwëtahnëđina nëf viyë vivë đuniña vi.

⁵ Ale lobëlëđ kodina nuña ge dënënëna sariya dobël ña.

⁶ Ayam ale horotëk đoku ña rëfëka tok ten le njamëk hna.

⁷ Nahary đus wante hnësëhnëmi ñi, do Ahwëhn a ntid awëry fop.

⁸ Dënkwëtaryehna Yesu Këris avë hnënk Ahnañ David, ale vëhnëndaniko hnë vësëm, had gante karanëđ Wanës Wakasëk wante fëyahñëđëfu ñi.

⁹ Soñe wañi Wanës Wakasëk horotëđëfu do ñabifu dënk gë vankënca had añen. Bare wanës Wënu ña ñabina!

¹⁰ Soñe rac ryuñëñahnëđëfu fop, nuñahnëni vële tëhñak Wën va fëna ipëh nte ye hnë

ibēmēnkēl fu gē Yesu Kēris ŋa gē icēmb nte wok pudīna ŋa.

¹¹ Wēlin wanēs toña ŋa:

«Age cēmēntinēkēfu hn'ikwētahn Kēris hna,
kwēhnantēdenēhēfu fēna uwám wā g'umē.

¹² Ge nduñēnayinēk,
nawētēdenēhēfu g'umē.

Ge njahētayinēka
umē fēna njahēta dēhēfu.

¹³ Ge fuhnē kahnēndayilēnēhna,
umē nkod kahnēnda
kabi kodīna njahēta umē dēnk.»

Ayohal afērēn

¹⁴ Dēnkwētehnēryindēhni vahnē va waji fop do gabēryihni gē fanka haryēnk Wēn hna antē conkēndēni soŋe wanēs. Wasonko warac kwēhnana nafa, ge gena mbēvehnēhni vēle hnēpad va.

¹⁵ Kamēnary aye ahnē ale lid fērēn do cēkwa Wēnu ŋa, ale wok cēfēhnēdīlahna gē doku lēwu ŋa do fēyahnēd g'usatah toña wanēs Wēnu ŋa.

¹⁶ Kehary fop wanēs wakwēhn nafa kēm do wok tēfēlēna g'ikwētahn ŋa, kabi vēle yehahnēk watac ŋa nawētādēniha g'ahawary Wēnu ŋa.

¹⁷ Wanēs wadēw hni ŋa had hajēhn hacēr nked. Hnē vahnē vērac nkentini Imene gē Filet.

¹⁸ Nawētani toña ŋa. Vēhni lehnēd Wēnu ŋa tēk mbēhnēndanēfu vēsēm hna do koyēna, tavētehnēdēnihēhni vēryampo ikwētahn dēw hni ŋa.

¹⁹ Bare Wēnu ŋa njawēnēkēhni vahnē vēlēwu va had sah ryēnkwēryēnk cery nte njēryēk.

Wañi wanës herik hnë rac: «Ahwëhn a njëtëkëhni vëlëwû va», do kat: «Ale-wo-le fëyahnëk Ahwëhn a hwëhnëka, tēfëka tav wameh ŋa.»

²⁰ Hn'acery nkwamah hna, gena viliyara vante ryëhwarik gë sanu ma gë koryi fo ye hnam, nke fëna vante fërik wadëhwa ma ŷahanik g'intil. Vëndampo soŋe vële lënënik va ye, vëyëntaŵ soŋe vële wok vëlënënina va ye. ²¹ Awa ge ahn'a pacënak gë fop wameh ŋa, gë viliyara vële lënënik mëntëndëlehnëdëni. Apacënik, nëfa soŋe Ahwëhn a, pëhwëtik nti fop doku fërën.

Ayohal Ahwëhn

²² Garyëry fop iña meh nte ye hn'ujar hna; yëkëlehnëryind usatah wã gë ikwëtahn ŋa gë iŋahn ŋa do gë yam ŷa, aye gë fop vële wëcadëha Ahwëhn g'intawãry pacah va.

²³ Bare kehary vankwajëla vante wok kwëhnana nafa va. Njëtëru sonko fo nagëf.

²⁴ Ayohal Ahwëhn a tēfëlahna nke ale sonkëntëde, tēfëka nke ale ŷahnëkëhni vahnë va fop, do kwëhna uyëf ikaraŋ vahnë do nke ale ryuñënad wameh wante ntehnëde ŋa.

²⁵ Tēfëka karaŋëndëhni wajira vële wajëtendëha va, mpëd Wënu ŋa gwëcëtëf wahakili walëw hni wã soŋe njëtahnëni toña ŷa.

²⁶ Koyëna wahakili walëw hni wã mbokad cat do cahnëdëni hnë urënd Sintani nte likëhni vëramp, ntihahnëni iña dëwû.

3

Wafac warëkwa

¹ Yëtëry waŋi: hnë wapuya duniya hna, nked uhorot usankaf.

² Vahnë va vankaf vantëw hni fo ñadëni, ñandëni koryi, mbëntandëni, naÿenandëni do njewëndëniha Wënu ña, vēwawëhnëdîlëlihna vēle hnagëkëhni va, vēsamëhnëdîlëhniha, vēlënënëdîlahna Wënu ña.

³ Njapëdëni, vēhwëhnadîna kaÿëhnahn, nësëndëni wameh vahnë, vēwëkëdîna wankaf vantëw hni, mbahnëdëhëhni walaŵary do ñewëdëni uferën ya.

⁴ Nkedëni vēroka vēyënta hni, rëkëdëni ntiyarëndëni ile-wo-le do naÿëna ña kwëyëndanëdëhëhni. Uhnatah lëw hni fo rëkëdëni ñandëni gena Wënu ña.

⁵ Ntiyehnadëni had vēle hahnëndak soŋe Wënu ña, bare njahëtađëni fanka ikwëtahn fa. Naŵëtaryihni vēle ye koyëna va.

⁶ Vëryampo hnë vēhni ntîdëni fere hafo tënkëni hnë watere do maŵehnedënihëhni vēsëval vēle pëbëk wameh do wasifa îna meh fop hahëdëhëhni.

⁷ Kwëlëkwël njëkëlehnëdëni ñëjani bare vēhodîna tëkënëni muk uyët toña ŵa.

⁸ Had gante nkwajëtehnihawo Moyis, Sanes gë Sambëres, koyëna vēyi vahnë nkwajëtehni toña ya. Vahnë vēhwëhn hakili rumpak ye do ikwëtahn dëw hni ña yaŵëna.

⁹ Bare vēyidîna naŵët, kabi vahnë va fop kamahnëdëni hnamb hakili lëw hni ŵa, had gante nkeho soŋe vēhni Sanes gë Sambëres ka.

¹⁰ Bare wëjê, njëtëru dŭs ikaraŋ mën ŋa, njasa mën ŋa, vile fëhnabu va, ikwëtahn mën ŋa, iduñëna mën ŋa, inahn mën ŋa, ikahnënda mën ŋa.

¹¹ Njëtëru dŭs gante mbërehnibu ka do gante korotëbu ka Antiyos hna gë Ikoniŷum hna do gë Lisëtër hna. Ha, paryi nke mbërehnibu dŭs, bare Ahwëhn a pehëtëko hnë waŋi fop.✧

¹² Fop vële ŷad tëfalëndëniha Yesu Këris va korotëndëni.

¹³ Bare vahnë vëwëh va gë vësihna va nkodëni tëwädëni kwëlëkwël hnë wameh hna. Tokadënihëhni viyëntaw va do tokadëni vëhni fëna.

¹⁴ Awa wëjê, yawënerÿ dŭs ile ŷëŋaru ŷa gë ile wawëru g'ipacahn. Njëtëruha ale ŷaŋëndëki ŷa.

¹⁵ Ha, njëtëru Vikerëh Vipacah va kobëri hn'utah hu hna; kod njëdäŷi yasery le yodëhi g'ipeh g'ikwëtahn hnë Yesu Këris.

¹⁶ Wënu ŋa lik hafo fop Vikerëh va nke wanës wadëwu. Nëfak soŋe karaŋahnini vahnë va, ni-rahni, catënahni do kwëdahnini hn'usatah.

¹⁷ Koyëna vahnë vëva Wën va kwëhnadëni wëka fadah soŋe ntihahnëni fop vantiyehn vapërën.

4

Pëyahh Wanës Wën

¹ Tëyëdëmi gë fanka fa, haryënkW Wën hna do haryënkW Yesu Këris ale hitiŋëdëhëhni vële

✧ **3:11 3.11:** Vantiyehn 13.1-14.28

wok wesëmëna gë vële sëmëk per, ge mbokajëk kahnënd inawñ dëwu ña:

² pëyahñëry wanës Wënu ña, pëyahñëry lakënde gena wati ile tēfëka hna; niraryind, ñañëraryind, kamënañëhñëryind do karañëryindëhni g'iduñëna cankañ.

³ Wati rëkid, vahnë va vëwodina ñandëni nëpa karañ pacah ña. Iña dëw hni ña fo pabëdëni. Mëcadënihëhni kore vëharañ vële rëkëd nësëndëni wante hnëñëdëhëhni fo.

⁴ Ciñadëni vanëf va soñe antë nkwëryëni toña ña do ciñëtani nkwëryahnëni wamër ña.

⁵ Bare wëjë, kwëtëry hakili hnë vile-wo-vile hna. Duñërary horot wã, diry doku afëyahñ Wanës Wakasëk ña, padëñëry dūs doku le njëdaki Wënu ña.

⁶ Kabi ami yëdahnëña yëbu ntawary mën ña had sadëha do biyëdina cëmëdëfu.

⁷ Mëtëbu uwët fërën wã, puhnañbu idobël iña, njawënëbu kwëtahn ña.

⁸ Tame buña imëk iña napëdëho: apënkwa imëk nte njëdadëho Ahwëhn hnë Fac Kitij hna ye do gena ami fo, bare soñe fop vële ñahnëd iboka dëwu ña ye.

Wanira watëkwa

⁹ Diry fere ayij ñap arëkato.

¹⁰ Demas tavëko, kabi iñi dñuniña tēfëk; Tesalonik njik. Këresen umë Galasi njik do Tit Dalëmasi njik.

¹¹ Lik fo wolahnëbun. Yoja Marëk, kabi kod ndemawo hnë doku Wën hna.

¹² Tisik, umë Efes sañëtëbuha.

13 Ge njijëdu yonëhne cud kwëhn huji nte ravëhëbuho Tërowas hna vëhni Karëpus hna; yoryaj fëna vëkayëte va, do dënk vante herik hnë wayand va.

14 Alekësandër aryëhwar a ntikoŵo ntavah yabah. Bare Ahwëhn a cosëdëha ðoku vantiyehn vantëŵu va.

15 Keharyehna wëjë fëna umë! Kabi nkwajëdëho ðus wanës fu ŋa.

16 Ahnë ðemalowohna ante nësadëfuho hnë kitija hna, fop tavënihowo. Arabi Wënu ŋa antë cosëhni ðoku vantiyehn vantëŵ hni va!

17 Bare Ahwëhn a ryemakoŵo do njëdakoŵo fanka falëŵu fa. Awa koyëna kolëbuho fëyahnëndu Wanës Wakasëk ŋa gë fanka, do fop vële wok vëyena wasëwif va nkwëryëdëni. Do Ahwëhn a pehëtëko hnë wës vësëhn hna.

18 Ahwëhn a fehëtëko hnë wameh hna fop do pehëtëdëho ndëno hn'inawë dëŵu ibë g'ambin hna; cëmbëndënëfuna kwëlëkwël! Amina.

Simpaŷi rëkwa

19 Gaŷëhëhni Përisëka gë Akilas do gë tere Onesifor ŷa.

20 Erasët Korent hna nkok. Do tavëbuha Tërofim Mile hna kabi tesëko.

21 Yij ñap ani gë tëkahnind wati wëh ŷa. Ebul gë Pudën gë Linus gë Këlodiya do gë fop vëyënta fu va nkaŷëryidënihi.

22 Arabi Ahwëhn a nkenti gë wëjë! Arabi ipërëna dëŵu ŋa nke gë wuhnë fop! Amina.

Wamey
Wamey: Vikerëh Vikasëk Wën gë Wapëgwala (New
Testament+)

copyright © 2018 Wycliffe Bible Translators, Inc.

Language: Wamey

Contributor: Wycliffe Bible Translators, Inc.

All rights reserved.

2025-04-30

PDF generated using Haiola and XeLaTeX on 30 Apr 2025 from source
files dated 1 May 2025
f961026b-f72f-5bd7-9f75-efa7f932577e